

欽定剿平粵匪方略

欽定勦平粵匪方略卷一百四十五 丙辰年

六年正月初二日 庚申陸元烺奏言接據周鳳山

等稟稱十一月二十四日樟樹賊匪三千人竄至拖船埠攻撲水師劉千涓督率戰船迎擊轟斃賊匪一百餘名賊卽敗退回巢十二月初四日周鳳山行抵距樟鎮五里之泉港墟當派都司滕國獻等督帶兵勇分攻賊壘該逆傾巢出

拒約三千餘人自辰至午鏖戰三時賊之藤牌
最爲兇悍周鳳山令兵勇以鉤連槍破之殺賊
六七百人賊始潰敗我軍直前追逐立將賊壘
五座焚燬燒斃賊匪五六百人餘匪由浮橋逃
走爲我軍所偪紛紛落水並焚賊船二十餘隻
時劉于涇賀虎臣各率水師轟擊對岸賊壘復
上岸繞至賊營後路拋擲火彈登時火起乘勢

衝入賊匪棄營逃竄立將賊壘礮臺盡行踏毀
時鎮內敗賊爭渡浮橋各戰船開礮轟擊斃賊
數百人各船砍斷浮橋直衝上游焚燬新造賊
船十餘號被擄民船百餘號隨即收復樟鎮又
據署新淦縣知縣李作士稟稱十一月十五日
臨郡逆匪竄至縣城對岸經兵勇擊退二十四
日復有賊匪數百屯聚對河逆衆數千潛自下

游渡河徑撲縣城被賊闌入又據奉新縣知縣
寶煦稟稱十一月二十五六等日瑞州逆匪屢
撲奉邑甘坊均經寶煦擊退二十八日賊衆四
五千人由六尺橋小路撲入縣城請速發兵往
勦臣查此次水陸兵勇收復樟樹洵爲妥速自
應乘此聲威進規瑞臨兩郡但新淦爲賊占踞
與樟樹毗連現飭周鳳山先將淦邑股匪撲滅

再行渡河次第克復瑞臨庶免賊匪復犯樟鎮
至奉新縣城離省僅祇百里亟宜撥兵往剿已
派遊擊遮克敦布等帶領練勇馳赴奉新以剿
爲堵用杜賊匪窺犯省城之路署新淦縣知縣
李作士奉新縣知縣寶煦被匪竄入城內實屬
防堵不力應請

旨將李作士寶煦一併革職責令帶罪隨營攻剿以觀

後敘奏八

上諭內閣曰逆匪由臨江分股竄擾樟樹鎮經副將周鳳山等分路進攻賊衆潰敗當將樟樹鎮收復著曾國藩陸元烺督飭各員迅將旁竄各匪勦洗克復瑞州臨江毋稍延緩現在新淦奉新均有匪蹤聞入雖因兵力較單究屬防堵不力著新淦縣知縣李作士奉新縣知縣寶煦均著革職帶罪隨營以觀後效

陸元煥又奏言查吉安府城被賊圍困業經臣
飛調練勇馳往救援茲據署贛州府知府楊豫
成候補知府周汝筠稟報陸續招募南康練勇
四千餘名於十一月二十七二十九等日行抵
贛郡並添募龍南勇一千名亦已抵贛卽令候
選同知周炎管帶先行周汝筠親督南康勇繼
進由泰和攻勦而下救援吉安惟泰和之賊現

分股攻撲興國縣城吉郡賊匪復分股擾及永
豐今南康龍南各勇旣已由贛起程亟應星馳
進剿速解吉安城圍興國之賊卽責成楊豫成
截擊勿任蔓延至永豐與撫州府屬之崇仁樂
安兩縣連界難保該逆不乘隙闖入窺犯撫建
二郡現飭崇樂二縣募勇一千名各守隘口並
調臨川南城練勇一千餘名省中抽撥練勇數

百名前往合力堵禦仍令周汝筠俟吉郡勦匪
事竣卽赴永豐勦辦殄滅寇氛以靖腹地奏入
報

初三日辛酉向榮奏言蕪湖賊壘負固節經我軍

水陸圍攻扼要堵禦江北神塘河口內忽有賊
匪嘯聚數千在泥汊河荻港一帶出沒窺伺李

德麟帶領紅船駛至神塘河進剿賊船鱗擁拒
戰擊沈三十餘隻斃賊百數十名羣逆駛船回
竄遁入河口乃收隊仍同白馬嘴三山扼泊以
遏上流總兵吳全美各船在下游截剿亦擊沈
裕溪口接濟賊船並斬獲南北偷渡賊划多隻
十二月初九日探有江北無爲州之賊竄應神
塘河匪股糾合上游賊船數百隻直逼荻港意

圖內犯甯國下援石壘經李德麟知會鄧紹良
飛調陸路兵勇分紮老鴉山魯港吳全美分撥
多槳快蟹趕往上游助剿將魯港紅單移上三
山接應李德麟駛近荻港擊沈大小賊船數十
隻斃賊無算餘船不敢抵敵紛紛竄入神塘河
當卽收隊扼泊派撥快划會同吳全美撥來快
蟹駛赴上游跟剿先後擊沈及奪獲賊船無數

鄧紹良陸路大軍連日截擊石壘內外之賊小有擒斬而陶陽鋪旗羅山各賊因聞神山營盤撤動悉衆來犯經各兵勇擊退賊忽於十六日夜焚壘竄回東梁山分踞戴橋龍山橋一帶該處接近青山乃內犯黃池衝要當將魯港老鵝山兵勇撤回分紮黃池以顧後路查蕪湖外援之賊旣經棄壘竄徙石壘應援已絕上游賊復

被懲自可乘此聲威迅圖掃蕩一面嚴加防堵
杜賊旁竄內犯之路至金陵逆賊糾合上游各
路黨與分屯各門仍圖援應鎮江臣已揀派兵
勇嚴密布置並飛函吉爾杭阿乘賊出巢會師
痛剿以靖妖氛奏入

上命軍機大臣傳諭向榮吉爾杭阿曰旗羅山等處賊
匪焚壘回竄東梁山向榮等已調魯港老鴉山兵勇

協紮黃池杜其內竄該處直接高淳東壩久爲逆匪
窺伺所派兵勇是否足敷堵截此時蕪湖陸賊雖棄
壘潛竄鄧紹良一軍仍應嚴扼上游恐不能分兵返
顧仍當確探賊蹤儘力堵截不可令其竄入腹地亦
不可因該逆回竄遽撤上游精銳兵勇致墮該逆牽
綴之計至金陵逆匪糾合上游各路黨與分屯各門
意圖援應鎮江向榮前已飭德安帶兵駐紮東陽鎮

斷其往來誠恐賊衆我寡未能得力著與吉爾杭阿
妥爲籌商總當誘賊出巢就地勦殺不特可免內竄
之患亦於克復城池事機更有裨益

初七日

乙丑

石景芬奏言金柱關賊匪在距黃池

十五里之亭頭地方滋擾又於查家灣搭造浮
橋希圖內竄復擾及距亭頭十五里之青山地
方該處前對金柱後通黃池東西梁山在望實

係甯郡門戶要隘臣星夜馳往擇險築營防守
未被該逆占踞遷徙各戶陸續搬回查家灣梅
塘嘴一帶二三十里地面居民安堵全行薙髮
臣仍勤發偵探以守爲攻相機籌辦如能克復
金柱關卽可扼斷金陵蕪湖逆賊往來之路蕪
湖以南賊卡不攻自潰連日探知金柱關賊匪
搭造浮橋挖濠塹並有由龍山橋侵犯消息

當卽撥隊迎剿斃賊三十餘人賊匪退入卡內
我軍縱火焚其外卡賊衆挂帆逃逸焚燒賊船
五隻浮橋一座焚溺之賊不計其數餘賊閉卡
死守復擊斃三百餘名賊勢已蹙克復之期當
亦不遠奏入

上命軍機大臣傳諭向榮曰本日據石景芬奏紮營青
山及進剿金柱關賊匪情形尙能扼要布置現值軍

務需人金柱關旣爲金陵蕪湖賊匪往來要道黃池
一帶防兵甚單著向榮卽飭該革員隨同鄧紹良認
眞堵剿以杜該逆內竄之路

上諭內閣曰已革安徽甯池太廣道石景芬著留江南
軍營交向榮差遣委用

十一日己巳曾國藩奏言查副將周鳳山會同水

師劉于瀉等進規樟樹鎮連獲大捷十二月初

四日卽將該鎮克復初八日周鳳山馳抵灌溪
聞新淦縣城有千餘賊盤踞該縣爲通撫州府
及省城要道若舍此徑剿臨江恐賊由東岸竄
擾蔓延撫建必須先克新淦乃無後路牽掣之
虞遂於初九日約同水師星夜進攻該逆聞風
懼怯紛紛竄渡臨江各營跟蹤追擊斃賊多名
其登岸之賊狂奔遠遁我軍入城安撫收復新

淦縣城查僞易王石達開占踞臨江府匪黨分
布瑞州新昌新淦奉新及袁吉各屬又以精銳
屯集於樟樹鎮扼省城之咽喉逆計實爲兇狡
周鳳山初統此軍先破樟鎮次收新淦仰仗
天威軍聲已振此次水陸弁勇奮猛出力籲懇

皇上天恩容臣擇尤彙保以示鼓勵奏入

上諭內閣曰此次周鳳山等督同水陸各軍疊獲勝仗

收復樟樹鎮及新淦縣城辦理尙屬得手所有在事出力文武員弁兵勇著曾國藩擇尤保奏候朕施恩

十四日
壬申 略秉章奏言江西一省自逆渠石達

開由湖北通城竄入義甯州新昌縣粵東賊匪王崇開等又從茶陵竄入江西永新安福與石逆會合分撲臨江吉安兩府近復分股竄踞袁州府城所屬俱陷江西與湖南兩省壤地毗連

江西之西路卽湖南之東路自郴州之桂東北
至岳州之平江千餘里閒犬牙相錯臣前密飭
劉長佑俟鄴茶勦匪事畢卽赴郴州掃除賊巢
移師赴江西協勦劉長佑自擊敗鄴茶股匪後
會勦郴州踞城之賊十一月二十六日郴城收
復賊由江西竄逸卽調劉長佑回軍由醴陵馳
援江西劉長佑已帶勇馳赴道州日內始行折

回由衡州馳赴醴陵臣已札調南北兩路各勇
先赴醴陵瀏陽兩縣邊界俟劉長佑進剿分隸
數營合成四五千之數以厚其勢以江西現在
賊勢言之袁州吉安臨江瑞州四府在在俱急
然袁州府地居總要楚軍赴援先須規復袁州
然後東北可以援臨瑞東南可以援吉安隨時
相機以取腹背夾擊之勢現飭劉長佑迅赴省

聞

垣面爲商推以期周妥奏入報

十六日

甲戌

向榮吉爾杭阿奏言查寶蓋山賊壘

與鎮江西門接連呼吸相應必先將寶蓋山賊

壘掃蕩城中之逆始不能以自存臣吉爾杭阿

會商余萬清虎嵩林派令兵勇在寶蓋山賊營

之前踏東路中路分道埋伏並伏兵於城之四

面同時進攻該逆四面死拒鏖戰四時之久將
賊壘外之卡棚梅花椿焚燬殆盡賊因我兵攻
勦甚急遣人前往金陵求救旋據謀報金陵首
逆調集上游賊衆將由南岸竄援鎮江僞被官
兵要擊卽渡過江北由六合儀徵而至瓜州再
行渡江南來以圖一逞管帶紅單船之總兵陳
國泰以儀徵縣之沙漫洲徑對南岸龍潭渡口

必須於沙漫洲停泊師船方足杜賊北犯儀徵之路稟經托明阿飭將駐守高資港口之紅單船調赴沙漫洲另調拖罾船及新造廣快等艇駛赴高資港口一帶交陳國泰調遣部署甫定上游大股逆匪直竄棲霞石埠橋一帶臣等當卽商派余萬清帶領兵勇一千二百名於十二月二十三日拔隊起程馳赴東陽會同總兵德

安等扼要堵勦總兵虎嵩林帶領兵勇七百名
馳赴高資督飭原有防兵八百名以爲後路援
應二十五日晚探知鎮逆意欲潰圍而出接應
上游之賊遂定以攻爲堵之計二十六日該逆
自鎮江西門迤邐而至寶蓋山出賊約四五千
人我兵嚴陣進攻分投勦殺自辰至午斃賊無
算該逆仍抵死衝突我兵復用車礮連環轟擊

逆勢難支始紛紛敗退回巢是役殺賊數以千計現在余萬清虎嵩林已在下蜀街紮營臣吉爾杭阿又添派楚黔精銳將余萬清帶去兵勇酌量抽換余萬清等營盤共有兵勇二千三百餘名連前調赴東陽高資兵勇一千六百餘名統計鎮江營盤調赴上游兵勇四千名與臣向榮派出官兵合力堵剿上游竄援之賊伏查該

逆此舉係以全力回救鎮江並有窺伺蘇常之意臣等惟有竭力堵其旁竄遏其下援庶幾堅城可拔蘇常可保無虞奏入

上命軍機大臣傳諭向榮吉爾杭阿托明阿陳金綬雷以誠曰金陵首逆調集上游賊衆將由南岸竄援鎮江如被官兵要擊欲由北岸至瓜州渡江以圖一逞必須於江面扼要截剿不可令其南北兩岸往來自

如著托明阿向榮嚴飭陳國泰調集師船於沙漫洲
一帶嚴密防剿杜其北竄之路至金陵賊黨竄撲棲
霞石埠橋等處鎮江之賊又欲潰圍而出是該逆以
全力回救鎮江且有旁竄內犯之慮此次殺賊雖以
千計而賊援未退余萬清虎嵩林所帶兵勇是否足
資堵剿著向榮吉爾杭阿飭令帶兵各員迅將棲霞
等處之賊併力剿擊該大臣等務須南北通籌水陸

並舉毋得日事耽延致有貽誤

十七日乙亥向榮奏言金陵逆賊自上年十一月

連次大創而其竄擾鎮江之心不死復糾集黨
與紛紛竄回十二月十九日接各路探報有賊
數萬由上游陸續竄至聞係蕪湖兩岸外援及
兩梁山金柱關與江北和含一帶並廬州三河
之賊陸續歸併金陵分布各城剋日大股出巢

衝竄一由神策門至仙鶴門抄拒我兵一由觀音門沿江至棲霞一帶直走鎮江一由南路秣陵以圖內犯並埋伏太平各門附近俟我兵分調各路卽來圍撲大營又有大小賊船在夾江窺伺下竄當與署江甯將軍福興籌商揀派馬步隊伍交總兵張國樑副將秦如虎統帶分起馳往仙鶴門迎剿飛檄秣陵東陽兩軍嚴加堵

截吞照怡良吉爾杭阿飭屬一體防堵調兵丹
陽固守要衝並由鎮營選派一軍馳赴東陽一
帶會勦分飭堵泊觀音門師艇及六合縣水勇
截擊下竄賊船二十二日張國樑秦如虎兩軍
馳至仙鶴門擊賊大勝直追至觀音門聞有賊
兩大股已沿江竄赴棲霞石埠橋一帶卽回軍
馳往截勦秦如虎分兵繞往東陽會同德安張

國樑一齊進攻該逆已於棲霞石埠橋之間築壘踞守張國樑督兵衝進極力勦洗德安秦如虎兩軍已到石埠橋之東與賊接仗羣逆敗退回巢城中復出賊數千由龍脖子來窺我楚粵兩營被擊敗退我兵將賊偪入明陵斬殺極多逆股復至南路元山一帶亦經明安泰擊回板橋斃賊無數伏查該逆四出衝突牽掣我兵大

營存兵有限分撥不敷因查蕪湖外援之賊業已竄回可以移緩就急當檄鄧紹良由蕪營抽調兵勇二千六百名前來助勦卽飭乘此機會協同舟師迅圖攻克石壘掃蕩逆氛並就近在秣陵撥勇先行馳往東陽責令德安秦如虎迅籌攻勦鎮營派來兵勇已由余萬清統帶馳抵龍潭探有賊匪數千由沿江洲路下竄秦如虎

余萬清由龍潭趕赴下蜀街攔截該逆卽潛遁
回巢有欲步步爲壘直徧鎮江之語龍潭上距
東陽五里內通句容丹陽其下十五里爲下蜀
街乃洲地前竄要隘當飭秦如虎至龍潭築營
催趨蕪湖調來兵勇趕往屯紮余萬清一軍紮
營下蜀街虎嵩林之兵由高資移併堵守本年
正月初三日探有賊匪數千由龍潭山後下竄

秦如虎馳往東路堦截將賊股悉力截回初五日見有賊大股竄下卽與李定太會兵渡河截勦逆衆大潰敗入三汊河其前股下竄之賊經余萬清虎嵩林等擊回該逆退踞李家橋地面秦如虎李定太等馳赴下蜀街協堵乘勝攻勦三汊河而李家橋賊股復由趙家橋衝竄余萬清等分路追截斬擊無數餘賊敗回李家橋而

去此半月以來連次堵剿之實在情形也此股
竄匪勢衆且悍我兵經旬剿截雖未能大挫賊
鋒而自東陽以至龍潭下蜀街連營三十餘里
該逆旣難飛越內犯亦無從竄擾鎮江所有沿
江河汊亦已由吉爾杭阿調撥下游戰船分泊
高資鮎魚套一帶截賊出江之路臣責成余萬
清等激勵各營迅掃羣醜張國樑設法截賊後

路明安泰嚴堵秣陵密防南面咨商督撫添兵
駐守丹陽以防內犯現在蕪湖情形較緩飛檄
總兵吳全美抽帶紅單船二十隻由梁山金柱
關節節掃蕩直偪江甯大勝關一帶以清江面
而分賊勢其餘蕪湖各船卽令交副將李德麟
統領分扼上游會剿石壘一俟蕪湖得手併下
合圍金陵剿辦更有把握奏入

上命軍機大臣傳諭向榮曰金陵逆賊糾合上游黨與分路竄擾經向榮派撥兵勇分投堵截布置均合機宜金陵東路兵勇雲集仍應亟籌進剿著向榮督飭余萬清鄧紹良等將洲地往來賊匪悉數殲除吳全美師船准其調赴大勝關協力攻擊其沿河港汊並咨會吉爾杭阿派撥戰船堵禦務令水陸各軍聲勢聯絡毋令竄越其蕪湖賊壘並著飭令李德麟等就

現有師船迅速攻勦前調紅單船隻業已自粵開行
一俟進江後卽著向榮妥爲調遣以資助勦

同日江西巡撫文俊奏言臣於十二月十六日

抵省接印詢知吉郡尙未解圍周炎周汝筠赴
援兵勇均尙未到泰和爲赴吉安必由之路恐
被匪衆阻隔復飛調興國縣武進士韓進春率
勇數千由間道赴吉援應二十四日接據袁臨

副將蔣益輝稟稱逆賊由分宜繞竄袁州郡城
於十二月初一日失守蔣益輝招集敗兵現紮
萍鄉縣蘆溪司地方守候湖南援兵到日隨同
攻勦永甯縣於十月二十日被賊攻陷泰和縣
於十一月十五日失守永豐縣於十二月初六
日失守吉水縣於十二月初一日失守並探得
九江府屬之德安縣城已被潯城賊匪竄踞萍

鄉新喻峽江上高靖安等縣均被賊擾義甯武甯建昌安義定南安遠等廳州縣紛紛求援全省幾無安謐之地伏乞

飭催湖南撫臣速撥勁旅數千揀擇久征能戰將領星馳赴江應援於大局實有裨益奏入

上命軍機大臣傳諭曾國藩文俊曰江西逆匪久踞瑞州臨江分擾袁州吉安各屬文俊甫經到任於該省

地勢軍情一時未能周悉現當萬分棘手之時儻布
置稍疏難免貽誤曾國藩自抵江西爲時已久賊情
亦所深悉匪蹤蔓延旣不能處處調兵又不能顧此
失彼自應擇其最要之處先爲攻剿現在瑞州臨江
袁州吉安四府究竟何處賊情最爲兇悍周鳳山一
軍旣由新淦進兵自應急剿臨江瑞州以殄賊渠周
汝筠一軍現阻泰和尤應設法疏通俾得迅抵吉安

劉長佑一軍離楚後應由何路進剿方能扼要著曾
國藩卽與文俊妥速會商務籌全局不可徒事張皇
亦不可專顧一處軍情變幻靡常大勢所關應從何
處下手身在行閒者必能挈其綱領著卽酌度機宜
會同馳奏以慰廑念至德化縣城據文俊奏稱已被
潯城賊匪竄踞此路一有疏懈關繫長江大局該侍
郎等近日如何布置並著速行奏報

上又命軍機大臣傳諭駱秉章曰江西軍情緊急亟須
厚集兵力痛加勦洗方能補救大局駱秉章已派劉
長佑帶兵由醴陵馳赴江西計該員此時當已由省
起程著卽飭令迅赴袁州一帶相機進勦所帶兵勇
總宜多爲添調合成勁旅毋令賊衆我寡難於制勝

二十四日
壬午
官文楊載福胡林翼奏言臣等連

日激勵各軍期將省城一鼓而復惟自我軍兩

路偏圍城外之溝壘日增又益以興國之賊萬人困守堅城以老我師十二月初二日陸師羅澤南李續賓率衆直攻八步街口二壘以奇兵襲壘之後諸勇偏近壘前拋擲火毬火箭壘中火起賊衆敗遁諸勇乘之以入截殺最多遂將八步街賊壘攻克初六日臣胡林翼督同羅澤南李續賓分攻各門賊悉衆來拒督勇截殺賊

衆敗歸壇角初十日李續賓往攻壇角蔣益澧
以左營前驅適賊出隊掘溝諸勇往撲賊潰李
續賓率右營後營乘之直逼壇角賊悉入壘抗
拒我軍三面圍攻奪入賊壘縱火焚燒適值賊
之火藥由興國州解到者尙存壘中一時火起
賊衆死亡殆盡乘勝將漢陽門外之壘踏破所
設船廠一併焚燬賊之焚死殺死及投江死者

數以千計城賊由竇伏行溝內思截我軍李續
賓據險以待羅澤南從洪山馳下由小東門城
根截出李續賓等復由小龜山殺下竇營訓營
亦從城根衝出賊乃竄歸十一日李續賓羅澤
南兩路接戰獲勝斃賊千餘又伏兵截殺賊七
八百名賊復於望山門外築葺石壘二座斷我
師進攻之路十八日我軍破其前壘賊復加修

次壘高與城等白沙洲之壘與壇角之溝日益
高深二十日三路進攻踏破土壘二座將守壘
之賊悉行駢斬復誘殺城中之賊數百名二十
三日李續賓出窰灣一帶截賊之餉賊率大股
七八千人由壇角經小龜山沿湖而下李續賓
督勇數百據險以戰賊衆莫之敢撓羅澤南由
洪山東西分兵抄出前後夾攻賊大潰敗殺斃

及溺死者無數計自十二月初二日至二十三
日城之東路南路東北路西南路賊壘均已蕩
平而江岸西北一隅之賊壘未破各營登城破
壘受傷甚多而士卒奮勇無一退卻臣楊載福
率水師於十二月初二日自沌口出隊至鸚鵡
洲派萬化林從鮎魚套下口攻剿瞿定國等從
鮎魚套上口攻剿李成謀張啟基等攻剿南岸

增壇角二處南岸嘴外水落洲藏有賊船數十
號我軍攻撲數次未能踰越遂併力以攻壇角
賊船中雜有糧食坐船有隙可乘我軍奮勇攻
撲賊勢不支焚燒賊船百餘號殺賊千餘餘船
逃竄追至青山收隊萬化林等攻打鮎魚套亦
焚燒賊船二十餘號並登岸攻破賊壘一座得
人礮二十餘尊初三日各營復出隊夾攻鏖戰

逾時李成謀奮勇衝入賊隊張啟基李濟清繼之賊始敗退仍依泊土城之下李成謀等從下擊之張榮貴等從上截之賊船火器齊施我軍不退一步船上之賊盡行擊斃復以大礮圍衝將其船隻擊壞臣楊載福卽飭萬化林等三營回紮沌口而自率瞿定國李成謀等仍紮漢口下游北岸帶兵都統都興阿見水師下駛率馬

隊馳三十里駐江岸以守護之露宿兩日夜屹
立不動水師將弁倍形感奮而馬隊亦因水師
之敢戰故露處兩日夜而不言勞也初四日萬
化林等三營自沌口出隊李成謀等七營由下
攻上賊死守不出因思上游賊船未盡終不便
久泊下游遂率十營回紮沌口初五初六等日
率兵往攻賊竟以負固不出爲得計連戰數日

共燒賊船百數十號擊斃賊匪甚多十九日夜
縱放火船焚燒南岸嘴洲外賊船數十隻鮎魚
套上口賊船二十餘隻二十日進攻鮎魚套又
斃賊約數百名營官喻吉三受傷猶能力戰不
退經旬以來水師疊獲大勝而弁兵亦多傷亡
然無一船損失無一人退卻臣等仍令水陸暫
養數日設法併力攻剿以期迅復堅城所有尤

爲出力及陣亡員弁臣等謹先行開列籲懇

天恩分別獎卹奏入

上諭內閣曰此次湖北省城外水陸攻勦士卒均奮勇前進無一退卻勦辦甚屬得手所有尤爲出力之外委陳玉輝著以千總拔補從九品劉騰鴻著以知縣選用知縣李續宜著以同知選用並賞戴花翎軍功楊高桂著以把總補用傳學海著賞給六品頂翎外

委彭彩南著以千總超補都司張榮貴王明山均著
以遊擊儘先補用守備萬化林李濟清均著以都司
儘先補用遊擊張啟基著以參將儘先補用守備陳
金鼇著以都司儘先補用並賞換花翎喻吉三著以
都司儘先補用其力戰陣亡之從九品劉卓巖著交
部照例議卹守備張福田劉高選均著照都司例從
優議卹千總賀采臣劉青四均著照守備例從優議

卹把總吳秀佩羅長發王美在曾旺益周玉堂黎天
才均著照千總例從優議卹外委廖自集鍾興胡裕
大王祥元朱福勝賀芝蘭戴有亮黃復勝董起隆徐
文章均著照把總例從優議卹軍功夏隆吉田羣良
朱達明劉步騮吳勝貴均著照把總例從優議卹

二十五日

癸未和春福濟奏言逆匪久踞舒城負

隅甚固必先破城外賊壘則襲取方有把握正

月初一初三初四等日更番進攻使逆匪應接
不暇十二日兵勇直逼城下分攻各門一面挑
選精銳出其不意攻打北門外賊營該逆猝不
及防恰值火藥轟發賊衆驚亂越壘逃出我軍
乘勢擁入砍殺多名逆屍枕藉卽將賊壘三座
先後奪獲約斃賊一千數百名十四日探得賊
衆被勦窮蹙意欲乘夜潛逃當派總兵郝光甲

等分攻各門總兵珠克登等於七里河一帶埋伏各路官兵攜帶攻城器具銜枚疾走齊抵城根音德布等帶兵豎立雲梯由東門首先登城同時各門亦緣梯而上齊聲喊殺頃刻各門火起官軍乘勢衝下賊匪急圖逃遁兵勇儘力砍殺餘賊由小東門南門逃出者經秦定三督兵截勦有向七里河而遁者珠克登等伏兵齊出

該處守營之賊聞聲驚潰兵勇趕到併力痛勦
殺死逆匪無數卽將賊壘五座一併奪獲統計
斃賊三千餘名隨將縣城克復查福建提督秦
定三久經戰陣勇敢老成此次克復堅城厥功
甚偉應如何

褒獎之處恭候

聖裁尤爲出力鎮將員弁仰懇

天恩先予鼓勵其餘在事出力員弁兵勇俟查明另行

請獎奏八

上諭內閣曰逆匪占踞舒城負隅抗拒經提督秦定三督率官兵節次痛勦於正月十四日克復縣城著和春等卽飭在事文武乘勝迅速前進將巢縣等城次第收復毋稍延緩秦定三督兵日久不憚勤勞著賞給騎都尉世職甘肅西甯鎮總兵珠克登著賞加頭

品頂戴三品銜署陝安鎮總兵郝光甲著賞給總兵
頂戴並賞戴花翎已革總兵音德布著開復原官仍
以總兵用並賞還花翎都司慶瑞著以遊擊儘先補
用並賞戴花翎五品銜曹遠榮著賞加四品頂戴並
賞換花翎其餘在事出力員弁兵勇著該提督等查
明另行奏請獎勵

二十九日
亥丁
向榮吉爾杭阿奏言正月十一日

夜有僞總制熊步芸及夥黨二人從便民河北
潛渡高資經兵勇擒獲搜出僞文內稱鎮江爲
金陵咽喉必須堅守囑令鎮逆竊踞高資接應
來援之賊臣吉爾杭阿督飭各營嚴行戒備一
面遴派遊擊伊經阿等帶隊埋伏於七里店要
隘並飭高資帶兵遊擊張汝琳等豫整隊伍爲
前後夾擊之計十五日有賊二千餘人潛出西

門散布於銀山寶蓋山谿谷間窺我虛實伺隙
上竄臣吉爾杭阿督隊馳往截擊用礮向山谷
連環轟擊該逆不能抵敵始行敗退斃賊約二
百人十六日該逆千餘人由江邊潛向西行將
至七里店地方伊經阿等伏兵突起守備周天
培策馬衝入賊陣該逆驚惶失措竄踞山梁復
有瓜州金山賊黨約三千人並自西門出賊約

二千人分股西竄知府劉存厚等列陣寶蓋山
東副將慶文等布陣寶蓋山西副都統綳閣等
管帶車礮由中路策應都司玉興管帶車礮排
列兵勇大隊之間伊經阿等由七里店追勦而
來正值該逆分股來犯兵勇分投攻擊該逆抵
死抗拒旋屬聚於金雞嶺我兵鼓勇而上賊勢
不支始行潰散追至城濠共斃賊約四五百名

上諭內閣曰已革道員石景芬前令留營差委原冀其
自知愧奮乃既輕率債事復敢掩敗爲勝希圖冒功
實屬昧良業經革職著毋庸留營差委所帶各勇卽
著怡良等飭令江長貴認真簡汰以收實效

同日官文奏言查武昌省城惟西面濱江漢陽
府城東臨襄河東南西南悉偪江面北蔽龜山
僅西北兩路可以進取我軍攻之益急該逆守

之彌堅自曾國藩全師赴援江西九江之賊陸續由大江南岸興國武昌一帶水陸紛竄武漢非謀勇兼施未能得手正月十一日臣飭令顏朝斌孔廣順等各率兵勇由五里墩進紮西門橋分軍進攻令巴揚阿帶馬隊爲合後李孟羣於梅子山一帶爲諸路策應訥欽等帶兵渡襄曾勦我軍甫抵西門橋逆衆出拒巴揚阿馬隊

直前將賊衆衝斷各兵勇奮力擊殺斃賊三百
餘名該逆敗歸城壘堅守不出十五日臣令顏
朝斌與王國才駐防沌口一軍互相對調以誘
之密於五里墩山梁左右伏兵而伺該逆窺見
我軍移營紛出大股乘機衝撲我軍佯退已過
五里墩伏兵齊起李孟羣親率廣勇復由中路
直擊該逆大敗其續出大股援賊被王國才等

自西衝殺共計斃賊三百餘名該逆敗竄回巢
我軍併力追捕又殺賊百餘名是夜復擊斃賊
數十名該逆經此數次勦敗益復堅守臣現已
添派馬步兵勇扼防大江北岸下游沙口一帶
並咨胡林翼派勇移紮南岸下游青山一帶遏
其外援趕造攻城器具以期迅速克復

同日曾國藩奏言臣前調周鳳山一軍飭令先

攻瑞州後勦臨江以瑞州偏近省垣僅百二十里也厥後周鳳山至省與陸元烺等熟商瑞臨在河之西與省城尙有一水之隔樟樹鎮在河之東於省城尤爲肘腋之患遂舍瑞州不攻改爲先攻樟樹次勦臨江之策迨克復樟樹一鎮新淦一縣本可渡河以勦臨江矣因吉安被圍緊急司道等移文周鳳山囑其赴援以解吉安

之圍而臬司周玉衡知府陳宗元在吉安圍城
之中亦飛書請援於周鳳山往返耽延遂逾二
旬現臣與撫臣文俊函商省城爲根本之地瑞
臨爲切近之災決計先勦臨江不得以四處告
警東瞻西顧徒延時日此周鳳山一軍未克遽
赴瑞州與臣前奏不符之實情也九江爲陸路
八省之驛道南康爲水路通省之總匯青山距

兩府城各四十餘里臣之水軍久駐青山兩岸
皆以陸軍護之實與九江呼吸相通自周鳳山
潯軍撤去之後九江小池口湖口梅家洲四處
之賊日夜環伺十一月二十日東岸湖口大戰
臘月初三日西岸青山大戰幸獲全勝厥後又
有土匪二千餘人自湖北興國州來竄踞德安
縣城聚散無常臣處青山老營防禦五處之賊

陸路存營之數不過二千九百人水路存營之數不過二千三百人兵力至爲單薄伏念臣軍自岳州而下水陸萬餘人合併一支從未分散去歲以來陸軍分爲三支羅澤南率援鄂之師五千人爲一支周鳳山接統塔齊布舊部四千人爲一支李元度等率平江各勇三千人爲老營一支水軍分爲兩支武昌十營楊載福所統

者爲外江一支鄱湖八營臣新調彭玉麟來此
統帶者爲內湖一支旣已分而爲五矣而李元
度駐湖之東又抽撥平江勇虎勇千餘人駐紮
西岸是陸軍三支之外又分一小支外江則李
孟羣帶船六十號別在襄河內湖則前撥船三
十號外頃臣又飭彭玉麟帶船三十號馳赴臨
江是水師兩支之外又分二小支愈分則人數

愈寡氣勢愈弱其在湖北者距臣八百餘里在
臨江者距臣五百餘里雖欲急圖合併而勢有
不能至於行軍之道擇將爲先得一將則全軍
振失一將則士氣消甲寅秋冬間臣軍所以長
驅千里勢如破竹者以陸路有塔齊布羅澤南
水路有楊載福彭玉麟諸人軍中士卒皆以塔
羅楊彭爲法沿江村市亦知有塔羅楊彭之稱

故能旌旗生色席卷無前不幸塔齊布中道殂
謝而羅澤南楊載福彭玉麟又分往湖北臨江
不克遽聚一處後起之才如周鳳山李續賓李
元度數人者又未知果能血戰成名仰邀

恩眷否臣惟當督飭老營水陸嚴防五路之賊一俟湖
北臨江兩處勦辦得手再圖會合歸併一軍掃
蕩羣醜均奏八報

